



Inatsisartunut ilaasortaq Kristian Jeremiassen, Inuit Ataqtigiit

Nassuttuumi eqqakkat pillugit § 37 naapertorlugu apeqquteqaammut nr. 138-2021-mut akissut

Asasara Kristian Jeremiassen

Nassuttuumi eqqakkat pillugit Inatsisartut suleriaasianni § 37 naapertorlugu Naalakkersuisunut apeqquteqarputit. Apeqqutitit uannut akisassanngorlugit innersuunneqarput.

Allakkat ulluat: 11-10-2021
Suliap nr.: 2021 - 18185
Akt-id: 18170733

Postboks 1614
3900 Nuuk
Tlf.: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

1. Nassuttuumi eqqakkanik saliinissaq kia akisussaaffiga?

Akissut: Siullertut erseqqissaatigerusuppara pinngortitamiinnitsinni eqqakkatta utimut nassartarnissaannut tamatta immikkut akisussaaffeqarnerput. Eqqagassalerineq kommunimit akisussaaffigineqarpoq, saliinermut suliniutissanik aallartitsinerit ilanngullugit. Nassuttuumi eqqagassalerineq taamaalilluni aallaaviatigut kommunip suliasaraa, taamaakkaluartoq kommunit imaluunniit Namminersorlutik Oqartussat killeqanngitsunik aningaasaateqanngillat, taamaattumik tamatta pinngortitap eqqiluitsuutinnissaanut ikioqatigiinnissarput pingaaruteqarpoq. Aallaaniarnermi atortunik eqqakkanillu allanik qimaannakkanik saliiniarneq nunarujussuarmi Kalaallit Nunaattut ittumi ajornarluinnangajappoq. Taamaattumik pissusilersortarnerup allanngortinnissaa pisariaqarpoq, taamatullu pinngortitami saliinermi nammineq kajumissutsiminnik sulerusuttut akuutinnissaat pisariaqarluni. Inuusuttorpassuit pinngortitamik paarsinissamut tunngatillugu qujanartumik siuarsarusussuseqarput. Inuusuttut taakkua avatangiisinut sinniisutut ingerlasinnaasut neriuutigaara aamma kinguaariit utoqqaanertaannut kaammattuissasut, taamaalilluta avatangiisinut mingutsitsinnginnerusumik pissusilersortarneq tamatta ilikkarniassagatsigu.

2. Nassuttuumi eqqakkanik saliisitsinissamut Naalakkersuisut pilersaaruteqarpat?

a. Saliisoqassappat qaqugu saliisoqassava?

Akissut: Nassuttuumi eqqakkanik saliinissamut Naalakkersuisut aalajangersimasunik maanna pilersaaruteqanngillat. Taamaattoq apeqqummut 3-mut akissut takuuk.


3. Nassuttuumi eqqakkanik salinissaq pillugu Naalackersuisuniit kommunit suleqatiserineqarniarpat?

Akissut: Nassuttuumi sumiiffinnilu allani pinngortitami eqqakkanik qimannakkanik peqarfiusuni, eqqakkanik salinissamut tunngatillugu kommunit (imaluunniit suleqatissat allat) suleqatiginissaannut Naalackersuisut aallaaviatigut piareersimaffigaat. Naalackersuisut Avatangiisinut aningaasaateqarfikkoortumik aningaasalersuinissamut tapersiinissamut periarfissaqarput. Kommunit, suliffeqarfiit innuttaasullu Avatangiisinut aningaasaateqarfikkoortumik ukiumut ataasiarlutik tapersiivigineqarnissaminnik qinnuteqarsinnaapput.

Avatangiisinulli aningaasaateqarfimmi aningaasaatit killeqarmata, taamaattumik Avatangiisinut aningaasaateqarfimmiit salinissamut tapersiineq, eqqakkatsinnik angerlaassinissamut tamatta pisussaaffeqarfitsinnik taarsiisinnaanngilaq.

Naalackersuisut aalisarnermut, piniarnermut aallaaniarnermullu atortunik annaasanut qimaannakkanullu suliniutissanut pilersaarut naammasseqqammerpaat. Suliniutissanut pilersaarummi ilaatigut erseqqissarneqarpoq, salinissamut suliniuteqarnerit pitsaaliuineramik suliniutissanik ataqatigiissinneqarnissaa pingaaruteqartoq, taamaalilluta eqqakkat pinngortitamii lertarnerat sapinngisamik pinngitsoorsinnaassagatsigu. Suliniutissat taakkua ilaat, tassani suliniutissanut pilersaarutip saniatigut siunnersuutigineqartoq, tassaavoq nunami nammineq kajumissutsiminnik avatangiisini nakkutiginnittussanik, nunami atortunik annaasanik qimaannakkanillu saliinermi ikiuussinnaasunik, pilersitsinissaq.

Inussiarnersumik inuulluaqqusillunga


Kalistat Lund